

三

社121
673
部大:72



文獻通考卷第二百七十五



鄱 陽 馬 端 臨 貴 與 著

封建考十六

唐諸王

唐高祖受禪以天下未定廣封宗室以威天下皇從弟及姪年始孩童者數十人皆封為郡王太宗即位因舉屬籍問侍臣曰封宗子於天下便乎尚書右僕射封德彝對曰不便歷觀往古封王者今日最多兩漢以降唯封帝子及親兄弟若宗室疏遠者非有大功如周之郇滕如漢之賈澤並不得濫叨名器所以別親疏也先朝

敦睦九族一切封王爵命既崇多給力役蓋以天下爲私殊非至公馭物之道也太宗曰然朕理天下本爲百姓非欲勞百姓以養己之親也於是率以屬疏降爵唯有功者數人得王餘並封爲縣公

貞觀二年太宗以宇內晏清思以致理謂公卿曰朕欲使子孫長久社稷永固其理如何尚書右僕射宋國公蕭瑀對曰臣觀前代國祚所以長久者莫不封建諸侯以爲磐石之固秦并六國罷侯置守二世而亡漢有天下參建藩屏年踰四百魏晉廢之不能永久封建之法實可遵行上然之始議永封列土之制禮部侍郎李伯

藥論曰周氏以鑒夏殷之長久遵黃唐之並建維城磐石深根固本雖王綱弛廢而枝幹相持故使逆節不生宗祀不絕秦氏背師古之訓棄先王之道剪華恃險罷侯置守子弟無尺土之邑兆庶罕共理之憂故一夫號澤七廟隳祀臣以爲自古皇王君臨寓內莫不受命上元飛名帝籙締構遇興王之運殷憂屬啓聖之期雖魏武攜養之資漢高徒役之賤非止意有覬覦推之不能去也若其獄訟不歸菁華已竭雖帝堯之光被四表大舜之上齊七政非止情存揖讓守之亦不可固焉以放勳重華之德尚不能克昌厥後是知祚之長短必在天

時政或盛衰有關人事宗周卜世三十卜年七百雖淪
胥之道斯極而文武之器猶在斯則龜鼎運祚已懸之
於杳冥也至使南征不返東遷避逼禋祀如綫郊畿不
守此乃陵夷之漸有類於封建焉暴秦運距閩餘數鍾
百六受命之主德異禹湯繼世之君才非啓誦借使李
斯王綰之輩咸開四履將閭子嬰之徒俱啓千乘豈能
逆帝王之勃興抗龍顏之祚命者也然則得失成敗各
有由焉而著述之家多守常轍莫不情忘今古理蔽澆
淳欲以百王之季行三代之法天下五服之內盡封諸
侯王畿千里之間俱爲采地是則以結繩之化行虞夏

之朝用象刑之典理劉曹之末鏃船求劍未見其可膠
柱成文彌所多惑徒知問鼎請隧有懼霸王之師白馬
素車無復藩籬之援不悟望夷之釁未甚羿浞之災復
思高貴之殃寧異申繪之酷此乃欽明昏亂自繫安危
固非守宰公侯以成興廢且數代之後王室寢微始自
藩屏化爲仇敵家殊俗國異政強凌弱衆暴寡疆場彼
此干戈侵伐狐貍之役女子盡鬻峭陵之節隻輪不返
斯蓋略舉一隅其餘不可勝數陸士衡方規規然云嗣
王委其九鼎凶族據其大邑天下晏然以理待亂斯言
之謬也而設官分職任賢使能以循良之才膺共理之

寄刺舉分竹何代無人至使地或呈祥天不愛寶人稱
父母政比神明曹元首方區區然稱與人共其樂者人
必憂其憂與人同其安者人必拯其危豈容委以侯伯
則同其安危任之牧宰則殊其憂樂何斯言之妄也封
君列國藉慶門資忘先業之艱難輕自然之崇貴莫不
代增淫虐時益驕侈離宮別館切漢凌雲或刑人力而
將盡或召諸侯而共樂陳靈則君臣悖禮共侮徵舒衛
宣則父子聚麀終誅壽朔乃云爲己思理豈若是乎內
外羣臣選自朝廷擢士庶以任之澄水鏡以鑒之年勞
優其階品考績明其黜陟爵非代及用賢之路斯廣人

無定主附下之情不固此乃愚智所辨安可惑哉至如
滅國殺君亂常干紀春秋二百年間略無寧歲次睢咸
秩遂用玉帛之君魯道有蕩每等衣裳之會縱使西漢
哀平之際東漢桓靈之時下吏淫暴必不至此爲政之
理可以一言蔽焉陛下獨照宸衷永懷前古將復五等
而修舊制建萬國而親諸侯竊以漢魏以還餘風之弊
未盡勲華既往至公之道斯革請待琢珉成朴以質代
文刑措之教一行登封之禮云畢然後定疆理之制議
山河之賞未爲晚也中書侍郎顏師古論封建表曰伏
聞前年陛下親發聖慮特降明勅博問卿士議欲封建

既合事宜實惟理要然而議者不一各執異端或欲追法殷周遠遵上古天下之地盡爲封國庶姓羣官皆錫茅社或云凋弊之後人稀土曠封建之事普未可行此皆不臻至理兩失其衷臣愚以爲當今之要莫不量其遠近分置王國均其戶邑強弱相濟畫野分疆不得過大間以州縣雜錯而居互相維持永無傾奪使各守其境而不能爲非協力同心則足扶京室陛下然後分命諸子各就封之爲置官僚皆一省選用法令之外不得擅作威刑朝貢禮儀具爲條式一定此制萬代永久則狂狡絕暴慢之心本朝無怵惕之慮特進魏徵議曰臣

聞三代之利建藩屏保又皇家兩漢之大啓山河同獎王室故楚國不恭齊桓有召陵之舉諸呂構難朱虛奮北軍之謀九鼎危而復安諸侯傲而還肅比夫秦之孤立子弟爲匹夫魏氏虛名藩扞若囹圄豈可同年而語哉至於同憂共樂之談百足不僵之義曹冏六代陸機五等論之詳矣陛下發明詔封五等事雖盡善時卽未遑何也自隋氏亂離百殃俱起黎元塗炭十不一存始蒙敷至仁以流元澤沐春風而霑夏雨一朝棄之爲諸侯之隸衆心未定或致逃亡其未可一也旣立諸侯當建社廟禮樂文物儀衛左右頓闕則理必不安粗修則

事有未暇其未可二也大夫卿士咸資祿俸薄賦則官府困窮厚斂則人不堪命其未可三也王畿千里地稅不多至於貢賦所資在於侯甸之外今若並爲國邑京師府藏必虛諸侯朝宗無所取給其未可四也今燕秦趙代俱帶蕃夷黠羌旅拒匈奴未滅追兵內地遠赴邊庭不堪其勞將有他變難安易動悔或不追其不可五也原夫聖人舉事貴在相時時或未可理資通變敢進芻蕘之議惟明主擇焉

六年監察御史馬周上疏曰伏惟詔書令宗室勲賢作鎮部貽厥子孫嗣守其政非有大故則無黜免臣竊惟陛下封之者誠愛之重之欲其允裔承守而與國無疆也臣以爲如詔旨者陛下思所以安存之富貴之然後使其爲世官也何則以堯舜之父而有朱均之子倘有孩童嗣職萬一驕愚則兆庶被其殃而國家受其敗正欲絕之則子文之理尤在正欲留之而樂厲之惡已彰與其毒害於見存之百姓則寧使割恩於已亡之一臣明矣則向所謂愛之者乃適所以傷之也臣謂宜賦以茅土疇其戶邑必有材行隨器方授則雖其翰翮非強亦可以獲免尤累昔漢光武不任功臣以吏事所以終全其代者良得其術也願陛下深思其宜使夫得奉大

恩而子孫終其福祿也

十一年詔曰設官司以制海內建藩屏以輔王室莫不明其典章義存於致理崇其賢戚志在於無疆者也今採按部之嘉名參建侯之舊制共理之職重矣分土之實存矣已有詔書存其至理繼世垂範貽其後昆維城作固同符前列荊州都督荆王元景凉州都督漢王元昌徐州都督徐王元禮潞州都督韓王元嘉遂州都督彭王元則鄭州刺史鄭王元懿絳州刺史霍王元軌虢州刺史虢王元鳳豫州刺史道王元慶壽州刺史舒王元名鄧州刺史鄧王元裕幽州都督燕王靈夔蘇州刺

史許王元祥安州都督吳王恪相州都督魏王恭齊州都督齊王祐益州都督蜀王愔襄州刺史蔣王暉揚州都督越王正并州都督晉王治秦州都督紀王慎等或地居旦爽夙聞詩禮或望乃間平早稱才藝並爵崇土宇寵兼車服誠孝之心無忘於造次風政之譽克著於期月宜冠藩垣胙以休命其所署刺史咸令子孫世世承襲

十一年又以司空長孫無忌爲趙州刺史改封趙國公尙書左僕射房元齡爲宋州刺史改封梁國公司空杜如晦密州刺史封萊國公特進李靖爲濮州刺史改封

衛國公特進高士廉爲申州刺史改封申國公趙郡王
孝恭爲觀州刺史改封河間郡王同州刺史尉遲敬德
爲宣州刺史改封鄂國公光祿大夫李勣爲蘇州刺史
改封英國公左驍衛大將軍段志元爲金州刺史改封
褒國公右領軍大將軍程知節爲普州刺史改封盧國
公兵部尚書侯君集爲陳州刺史改封陳國公任城王
道宗爲鄂州刺史改封江夏郡王太僕卿劉弘基爲朗
州刺史改封夔國公金紫光祿大夫張亮爲澧州刺史
改封鄖國公詔曰周武定業胙茅土於子孫漢高受命
誓帶礪於功臣豈止重親賢之地崇其典禮抑亦固磐

石之基寄以藩翰但今之刺史古之諸侯雖立名不同
而監統一也故申命有司斟酌前代宣條委共理之寄
象賢存代及之典司空無忌等並策名運始功參締構
卽令子孫世世承襲非有大故無或黜免餘官食邑並
如故其後無忌將之國情皆係戀不願是行辭不獲免
謬出怨言以激上怒曰臣披荆棘以事陛下今海內寧
一乃令世牧外州復與遷徙何異因上表固讓太宗謂
之曰割地以封功臣古今之通義也意欲公之枝葉翼
朕子孫長爲藩翰傳之永久情在此耳而公等薄山河
之誓發言怨望朕亦安可強公以土宇邪太子左庶子

于志寧以古今事殊恐非久安之道上疏爭之竟從志寧議

劉秩政典曰自漢以降雖封建失道然諸侯猶皆就國今封建子弟有其名號而無其國邑空樹官僚而無泣事聚居京師食租衣稅國用所以不足也

按文中子後序言太宗嘗讀周官辨方正位體國經野設官分職以爲民極之言慨然歎曰不井田不封建不足以法三代之治然則詔羣臣議封建必是時事也後之儒者往往追恨當時諸臣不能將明英主之美意使生民復見三代之治以爲遺

憾愚嘗竊論之以爲必能備究古今之事情然後可以斷其議論之是非法制之得失蓋封建一事漢以來未嘗廢也然行之輒利少而害多其故有二一則不能存三代之公心二則不能存三代之良法公心者何昔文武成康之衆建諸侯也有德有功者則畀之初未嘗專以私其宗親雖曰兄弟甥舅之邦然所封皆極一時之選若其果賢則微子尹東夏蔡仲君蔡邦雖仇讐不廢也若其不賢則管蔡爲戮五叔無官雖同氣不怨也至漢則且私且忌故始則勦滅異代所建國而盡以畀其功

臣繼則勦滅異姓王而盡以畀其同宗又繼則勦滅疏屬劉氏王而盡以畀其近親而其所建置若鼻若長之徒初無功德足以君國子民特以其近親而王之故不旋踵而犯上作亂墟其國而隕其身矣蓋有先王之公心則其弊不至於此良法者何昔先王之建邦也上有方伯連率下有公侯伯子男小大相維尊卑相制如公侯受封之地雖多而制祿不過十倍其卿城國不過半天子之軍名山大澤不以封必賜弓矢然後征必賜圭瓚然後鬯有巡守有述職有慶有讓綱紀未嘗一日隳也

若漢初諸侯王則畀以大城名都連數千里未嘗爲之分限山澤蓄貨在其國者不領於天子之大農五嶽四瀆在其國者不領於天子之祠官故爲諸侯者一受封之後卽自負其富強摘山煮海招納亡命擅爵人赦死罪天子不能訶謀臣不敢議所以縱恣之者如此及景武之後則作佐官之律嚴附益之法吹毛求疵積毀銷骨所以猜防之者復如此蓋方其縱恣也則畏之有同乎敵國及其猜防也則抑之不啻如謫徙矣蓋有先王之良法則其弊不至於此由漢而來有天下者未嘗不王

其昆弟子姓而名之曰封建然其得失與漢無以大相遠蓋其初也惟務私其宗親未嘗有擇德而授之意故有國者不皆可使南面之人而復不能固結之以恩義繩律之以法度故仁恕者則流於縱恣西晉是也尅核者則過於猜防曹魏是也而晉魏皆緣是以亡是豈封建誤之哉先王之意之法不存而強慕美名則適足以爲禍亂之階耳唐太宗亦好名之主然審時量已固自不能存帝王之心而行帝王之事矣故刺史世襲之詔不久而遂停而當時諸臣雖以魏鄭公之賢亦以爲事雖

至善時卽未遑而有五不可之說蓋其度之審矣如顏師古之議欲封建與郡縣並行王侯與守令錯處則漢初已嘗如此至景帝令諸侯王不得治民補吏而漢置內史以治其地則封建之地悉爲郡縣矣蓋古之所謂諸侯卽後之所謂守令然自漢中葉以後王侯之與守令始判然爲二承流宣化而實有治人之責者守令也食租衣稅而但襲茅土之封者王侯也令欲並建則凡王侯受封之地必盡廢內史之官卽付之兵民之任而後可但恐恣縱專擅犯上作亂復如漢初之事容之則廢

法而貽子孫之深憂誅之則傷恩而失封建之初
意矣又况魏晉以後王侯多是虛封有三分食一
四分食一五分食一者又有非其境內之地而遙
封者如元魏之以會稽蒼梧建業丹陽等郡封其
臣爲公侯之類是也蓋戶封旣爲虛名則受封者
之俸祿必仰給於縣官而出納之吝有所不能免
於是遂有虛食真食之異今欲盡復舊制則王侯
受封之地其戶邑之入必合盡捐以予之地旣瓜
分租賦隨之京師府藏頓鮮無以供軍國之用非
居上之利也又王侯於所受封之郡邑旣無撫字

之責而徒利租賦之入於是一意侵漁不顧怨讟
爲封戶者甚於征行非百姓之利也又所謂王侯
者非子弟卽勲臣素號名貴人華屋玉食之奉於
京師爲宜今使之塊處外郡朝不坐宴不預憂讒
畏譏此絳侯之所以恐懼長孫司空之所以怨望
然則又非受封者之利也夫封建者古帝王所以
建萬世之長策今其公心良法一不復存而顧強
希其美名以行之上則不利於君中則不利於臣
下則不利於民而方追咎其不能力行此書生之
論所以不能通古今之變也

唐制皇兄弟皇子為王皆封國之親王

龍朔二年制諸王子嫡者封郡

王任職從四品下敘其眾子封郡公從五品上叙貞觀中王珪奏曰三品以上遇親王於塗皆降乘違法申敬

有乖儀注太宗曰卿欲自尊而卑吾子乎魏徵曰自古迄今親王班次三公以下今三品皆天子列卿及八座

之長為王降乘非王所宜當也詔從之 親王府各置官屬 凡府官國官王未出閣則皆不

置領親事帳內二府及國官太子男封郡王其庶姓卿

士功業特盛者亦封郡王 自至德元載至大歷三年封異姓為王者凡百一十有二

人 其次封國公其次有郡縣開國公侯伯子男之號亦

九等並無官土其加實封者則食其封分食諸郡以租

調給 自武德至天寶實封者百餘家自至德二載至大歷三年食實封者二百六十五家凡食四萬四千

八百六十戶 十六年制王府官以四考為限 高宗時滕王元嬰江王元祥蔣

王揮號王鳳俱以貪暴為吏人所患有授其府官者皆比嶺外荒裔為之語曰寧向儋崖象白不事江滕蔣號

嗣聖二年初置公府官員武太后天授二年又置皇孫

官員開元四年三月制諸封國自始封至曾孫者其封

戶三分減一十年加永穆公主封千戶凡諸王及公主

以下所食封邑皆以課戶克州縣與國官邑官共執文

帳准其戶數收其租調均為三分其一入官其二入國

公所食邑則全給焉二十年五月勅諸食邑實封並以

三丁為限不須一分入官其物仍令封隨庸調送入京

親王府置傅一人 師範輔導參議可否初置 咨議參

軍一人 匡正幕府 友一人 陪隨左右 文學二人 脩撰文章

乾隆十二年校刊 封建十六

經史東西閣祭酒各一人接引賓客長史司馬各一人通判椽一

人通判功倉屬一人通判兵騎主簿一人覆省記室參

軍二人掌表啓書疏錄事參軍一人受事功曹倉曹戶

曹兵曹法曹士曹等參軍各一人各有參軍二人行參

軍四人掌出使及典籤二人宣傳親事府置典軍副典

軍各二人掌守衛執仗親事執弓刀執乘親事各十六

人供進親事三百三十三人帳內府置典軍副典軍各

三人掌儀衛陪從帳內六百六十七人親王國施行公

署式嗣王以國令一人大農二人通判尉二人分丞一

人監印小吏有差若府主薨則諸府佐視事帳內過葬

追退雖無妻子其國官聽終喪若有襲爵者諸公主邑

司有家令丞錄事各一人並隸宗正寺

景龍三年應食封邑者一百四十餘家應出封戶凡

五十四州皆天下膏腴物產其安樂太平公主封又

取富戶不在損免限百姓著封戶者甚於征行十一

月河南巡使監察御史宋務光上疏曰臣聞分珪列

土各有方位通邑大都不以封錫前猷未遠古義亦

深自頃命侯稍殊舊式莫居堯堦專擇雄奧徐州貢

土方色已乖寢邱辭封讓德不嗣且滑州者國之近

甸密邇帝畿地出縑紈人多趨射所以列縣惟七分

封有五王賦少於侯租入家倍於輸國求諸旣往實所未聞每科封丁有甚征役因而失業莫返其居此土風逃者舊少頃日波散良緣封多伏願稍均封戶散配餘州下息疲疇上遵古制則公侯不失於采地流人得還於故鄉諸州封戶亦望准此又徵封使者往來相繼旣勞傳驛甚擾公私請附租庸每年送納望停封使以靜下人仍編入新格庶爲永例又聞五等崇榮百王盛典自非邢茅懿戚寇鄧洪勲無以誓彼山河疇其爵土近者封建頗緣恩澤功無橫草人已分茅遂使沃壤名藩多入侯國邑收家稅半於天

府經費不足蓋亦有由竊見武德之初建侯故事於時天保新定王業創開佐命如雲謀臣如雨然而封者不過十數人今禮樂承平邦家繼世有象賢舊德之裔無野戰攻城之勤至於命封不合全廣論功謝於前業食邑多於往時旣減邊儲實虧國用伏惟酌宗周之前訓咨武德之舊章地匪宗盟勲殊社稷不宜加於實邑自可寵以虛名如此則庶績其凝彝倫攸敘臣忝當廉問備採風謠見此不安豈敢自默知必被封家所疾顧常以報國爲心乞擇愚言訪諸朝宰秋毫有益夕死無憂兵部尚書韋嗣立上疏曰臣

竊見食封之家其數甚衆昨問戶部云用六十餘萬丁一丁兩疋計一百二十萬疋已上臣頃在太府知每年庸調絹數多不過百萬少則七八十萬以來比諸封家所入全少臣聞自古封茅土列山河皆須業著經綸功申草昧然後配宗廟之享承帶礪之恩往者皇運之初功臣共定天下當食封纔祇三二十家今以恩澤受封百四十家已上國家租賦大半私門私門資用有餘國家支計不足有餘則或致奢僭不足則坐致憂危制國之方豈謂爲得封戶之物諸家自徵或是官典或是奴僕多挾勢騁威凌茂州縣凡

是封戶皆不勝侵漁若戶不滿丁物送太府封家但於右藏請受不得輒自徵催則必免侵漁人冀蘇息矣

愚嘗謂古之諸侯卽後之守令自漢以來始判而爲二爲王侯者於其受封之地實無撫字之責而但利其租食之入於是反爲百姓之患若宋韋二公之疏所言尤詳故備著之

江夏郡王道宗太祖曾孫高祖兄子以從秦王討賊功初封任城王貞觀時更封永徽初坐罪流象州薨子景恒封盧國公

道興道宗弟初封廣寧郡王後以疏屬降封縣公

永安壯王孝基武德初封二年將兵討劉武周師敗為

賊所害 道立以兄子嗣封高平王後降為公

淮陽壯王道元武德初封後將兵討劉黑闥戰歿 道

明以弟嗣王坐罪奪爵

長平肅王叔良武德初封子孝協初王范陽後降為郇

國公 思訓中宗復位以宗室耆舊封隴西郡王

新興郡王德良叔良弟 晉 坐罪 誅

長樂郡王幼良德良弟後坐罪賜死

蔡烈王蔚 子安武德時封 琛 儉 降為 公

河間元王孝恭安子子崇義嗣降封譙國公

濟北郡王城安子武德初封

漢陽郡王瓌安子武德初封後降為公

廬江郡王瑗蔚孫武德初封後坐反誅

淮安靖王神通武德初封子道彥嗣後降為公

孝答神通子初封高密王

孝同神通子初封淄川王

孝慈神通子初封廣平王

孝友神通子初封河間王

孝節神通子初封清河王

孝義神通子初封膠西王後並降為公

孝逸神通子封梁郡公

襄邑王神符神通弟武德初封子七人初並封郡王

後降為公

隴西恭王博父世祖孫高祖兄蜀王湛子武德初封

渤海敬王奉慈博父弟武德初封

右太祖世祖子孫王者

息隱王建成高祖長子帝即位立為太子後為太宗所殺追封息王

太原王承宗建成長子蚤卒

安陸王承道 河間王承德 武安王承訓 汝南

王承明 鉅鹿王承義俱建成子建成死時並坐誅

衛懷王元霸蚤薨武德初追封諡 泰太宗子以嗣元

霸 保定宗室西平王子泰徙封復以保定嗣

巢刺王元吉初封齊王後為太宗所殺追封

梁郡王承業 漁陽王承鸞 普安王承獎 江夏

王承裕 義陽王承度俱元吉子元吉死時並坐誅

楚哀王智雲隋大業末高祖起兵吏捕送長安害之武

德初追封 寬太宗子 靈龜 福降為公 承况神龍中同節愍太子

難死於

乾隆十二年校刊

武德通考卷三十三 封建十六

六

荆王元景武德三年封後坐預房遺愛反謀賜死 長

沙降為侯逖復王爵無子國除

漢王元昌武德三年封後坐預太子承乾反謀賜死國除

鄴悼王元亨武德三年封蚤薨無子國除

周王元方武德四年封貞觀時薨無子國除

徐康王元禮武德四年封子茂嗣後坐罪廢 延年坐罪貶國

除諷再嗣封

韓王元嘉武德四年封武后時坐謀舉兵誅武氏遇害

訥元嘉第五子神龍初復嗣爵 叔瓌 煒

彭思王元則武德四年封 絢以霍王子嗣 志暉

鄭惠王元懿武德六年封子璠嗣 希言

霍王元軌武德四年封武后時坐預謀舉兵廢死

緒元軌子封江都王 暉

純亦元軌子封安定王

虢莊王鳳武德六年封子翼嗣 寓 邕 巨

道孝王元慶武德六年封子誘嗣 微 鍊

鄧康王元裕貞觀五年封 炅 孝先

舒王元名貞觀五年封後為武后所殺

亶元名子封豫章王亦為武后所殺津 萬 藻

魯王靈夔貞觀五年封後坐謀起兵討武氏見害

訖靈夔子為清河王早天

藹靈夔子為范陽王 道堅子字嗣

江安王元祥貞觀五年封子暉嗣坐罪誅 欽

皎元祥子封武陽王 繼宗

密貞王元曉貞觀五年封子穎嗣 勗 曇 徹

滕王元嬰貞觀十三年封子脩琦嗣 涉 湛然

右高祖子孫王者

常山愍王承乾太宗長子武德三年封常山王太宗即位立為太子後坐謀逆廢為庶人徙黔州死

楚王寬武德三年出後楚哀王蚤薨貞觀初追封

吳王恪貞觀二年封永徽中長孫無忌譖殺之子仁貶

為鬱林縣男中宗反正改王成紀以預誅武三思死

祗 祗 嶽

濮恭王恭貞觀二年封子欣嗣 嶠

徽泰次子封新安郡王

齊王祐武德八年封後坐反廢為庶人賜死

蜀悼王愔貞觀五年封永徽時以吳王恪母弟得罪廢

徙俄復封涪陵子璠嗣 禴

蔣王暉貞觀五年封子煒嗣為武氏所害 紹宗 欽

福

越王貞貞觀五年封中宗廢貞起兵討武氏不克死子

冲與貞同死開元初追復爵王琳

紀王慎貞觀五年封武后時謫死證行同

東平王續慎子

義陽王叡慎子為武氏所殺

趙王福貞觀十三年封出後隱太子思順

曹王明貞觀二十一年封出後巢刺王高宗時坐太子

賢事廢死子俊嗣為武氏所殺允戡臯

右太宗子孫王者

燕王忠高宗長子貞觀二十年封帝即位立為太子後

立武后子弘乃降封王尋為許敬宗所誣賜死

澤王上金永徽初封後為武氏所殺子義詢神龍初嗣漣

許王素節永徽初封後為武氏所殺子瓘神龍初嗣益

孝敬皇帝弘永徽六年封代王顯慶元年立為皇太子

後為武后所鳩追諡帝

章懷太子賢始王潞後立為太子以忤武后廢死守

禮承宏

樂安王光順犍為王守義並賢子

右高宗子

懿德太子重潤中宗長子永淳時立爲皇太孫中宗失位廢後封邵王爲武氏所殺神龍初追贈

譙王重福高宗時封神龍初爲韋后所譖廢徙睿宗立召還至東都謀作亂不克死

節愍太子重俊聖歷三年封義興王中宗復位立爲皇太子後與李多祚等殺武三思兵敗死睿宗立追諡子宗暉封湖陽郡王

右中宗子

讓皇帝憲睿宗子文明元年立爲皇太子後改王壽王又改王宋元宗卽位徙王寧薨追諡帝子璿封汝陽王

莊憲子封濟陰王

琳憲子嗣寧王

瑀憲子封漢中王

惠莊太子撝垂拱三年封恒王開元時薨贈太子 珣 璿

惠文太子範初封鄭王從元宗誅太平有功開元十四年薨贈太子子瑾嗣 珍 後坐罪死

惠宣太子業始封趙王後進王薛開元二十二年薨贈太子

瑗業子封樂安王

瑒業子封滎陽王

瑁業子嗣薛王

右睿宗子

奉天皇帝侖元宗子景雲元年封許昌郡王天寶十載薨贈太子肅宗立諡帝子侖嗣

太子瑛初封真定王開元三年立爲皇太子後爲武惠妃所構爲庶人賜死寶應初贈太子

儼瑛子封新平郡王

伸瑛子封平原郡王

侏瑛子嗣慶王

棣王琰開元二年始封後坐罪以幽死

僎琰子王汝南

僑琰子王宜都

俊琰子王濟南

佺琰子王順化

鄂王瑤開元時封二十五年爲武惠妃所譖與太子瑛同廢死

倩瑤子王陳

靖恭太子琬始王郵徙王榮天寶末薨追諡太子

俯琬子王濟陰

借琬子王北平

光王琚開元十三年封二十五年為武惠妃所譖與太子瑛同廢死

儀王璿開元十三年封

侁璿子王鍾陵

健璿子王廣陵

穎王璿開元十三年封建中時薨

神璿子王滎陽

儻璿子王高邑

永王璿開元十三年封至德初謀反兵敗死

僂璿子王餘姚

壽王瑁開元十五年封大歷十年薨

僂瑁子王德陽

伾瑁子王濟陽

僊瑁子王廣陽

延王玢開元十三年封興元初薨

倬玢子王彭城

佺玢子王平陽

盛宣王琦開元十三年封廣德二年薨

償琦子王真定

乾隆十二年校刊

文獻通考卷一百一十五 封建十六

三

佩琦子王武都

濟王環開元十三年封

僚環子王永嘉

俛環子王平樂

信王璲開元二十一年封

佟璲子王新安

倜璲子王晉陵

義王玘開元二十一年封

儀玘子王舞陽

廖玘子王晉陽

陳王珪開元二十一年封

倫珪子王安南

佗珪子王臨淮

倭珪子王安陽

豐王珙開元二十一年封廣德初坐罪賜死

佻珙子王齊安

恒王瑱開元二十一年封代宗時薨

涼王璿開元二十一年封代宗時薨

仉璿子王瀘陽

汴哀王敬開元二十一年封明年薨

右元宗子孫王者

文獻通考卷第二百七十五

文獻通考卷第二百七十六

鄱陽馬端臨貴與著

封建考十七

唐諸王

越王係肅宗子元宗末年封肅宗寢疾張后召係矯制作亂坐誅

建係子王武威

道係子王興道

承天皇帝倓初封建寧王張后譖之坐賜死大歷三年追諡帝

乾隆十二年校刊

文獻通考卷第二百七十七 封建十七

衛王佖始王西平早薨

彭王僅始王新城

鎮僅子王常山

兗王儻始王潁川寶應初薨

涇王佺始王東陽興元初薨

鄆王榮始王靈昌早薨追封

襄王儂至德二載封貞元七年薨

宣儂子王伊吾

宋儂子王樂安

杞王倕至德二載封貞元十四年薨

召王偲至德二載封元和元年薨

恭懿太子紹始封興王上元元年薨贈太子

定王侗至德二載封寶應初薨

右肅宗子

昭靖太子邈上元二年封益昌王大歷八年薨贈太子

均王遐早薨貞元中追封

睦王述大歷十年封貞元七年薨

丹王逾大歷十年封元和十五年薨

恩王連大歷十年封元和十二年薨

韓王迥大歷十年封貞元十二年薨

簡王邁大歷十年封元和四年薨

益王迥大歷十四年封

隋王迅大歷時封興元元年薨

荆王選早薨建中二年追封

蜀王遡大歷十四年封

忻王造大歷十年封元和六年薨

韶王暹大歷十年封貞元十二年薨

嘉王運大歷十年封貞元十七年薨

端王遇大歷十年封貞元七年薨

循王遒大歷十年封

恭王通大歷十年封

原王達大歷十年封太和六年薨

雅王逸大歷十年封貞元十五年薨

右代宗子

舒王誼本昭靖太子子德宗取以爲子永貞元年薨

通王謚大歷十四年封

虔王諒大歷十四年封

肅王詳大歷十四年封建中二年薨

文敬太子諫本順宗子德宗愛之取以爲子貞元初封

十五年薨

資王謙大歷十四年封

代王誼蚤薨建中二年追封

昭王誠貞元二十一年封

欽王鄂順宗卽位封

珍王誠順宗卽位封太和六年薨

右德宗子

郟王經貞元四年封太和八年薨

均王緯貞元四年封開成二年薨

淑王縱貞元四年封開成元年薨

莒王紆貞元四年封太和八年薨

密王綢貞元四年封元和二年薨

郇王總貞元四年封元和三年薨

邵王約貞元四年封元和元年薨

宋王結貞元四年封長慶二年薨

集王緡貞元四年封長慶二年薨

冀王綵貞元四年封太和九年薨

和王綺貞元四年封太和七年薨

衡王絢貞元四年封寶應二年薨

會王纁貞元二十一年封元和五年薨

福王縉貞元四年封咸通二年薨

珍王繕貞元四年封

撫王紘貞元二十一年封乾符三年薨

岳王緄貞元二十一年封太和二年薨

袁王紳貞元二十一年封咸通元年薨

桂王綸貞元二十一年封元和九年薨

翼王綽貞元二十一年封咸通三年薨

蘄王緝咸通二年封咸通八年薨

欽王績無封薨年

右順宗子

惠昭太子寧貞元二十一年封平原王元和四年立為

太子薨

澧王暉憲宗即位封

漢暉子王東陽

源暉子王安陸

演暉子王臨安

深王悰元和初封

潭悰子王河內

淑悰子王吳興

洋悰子王忻

始悰子王高密

進棕子王洋

絳王悟元和初封後爲王守澄所殺

洙悟子王新安

滂悟子王高平

建王恪元和初封長慶元年薨

鄜王憬長慶元年封開成四年薨

溥憬子王平陽

瓊王悅長慶初封

津悅子王河間

汜王郇長慶初封

瀛郇子王晉陵

婺王懌長慶初封

清懌子王新平

茂王愔長慶初封

漙懌子王武功

淄王協長慶初封開成元年薨

澣協子王許昌

渙協子王馮翊

衡王儻

涉儻子王晉平

澶王悅長慶初封

濶悅子王鴈門

棣王惲大中六年封咸通三年薨無子

彭王惕大中六年封後爲韓建所殺

信王愐大中六年封咸通八年薨

榮王愍咸通三年封子令平嗣

右憲宗子

懷懿太子湊長慶元年封漳王後爲王守澄陷以罪黜
爲巢縣公開成三年追贈

安王溶長慶元年封後爲仇士良所殺

右穆宗子

悼懷太子普寶歷元年封晉王太和二年薨追贈

梁王休復開成二年封

襄王執中開成二年封

案執中子王樂平

紀王言揚開成二年封

陳王成美開成二年封後爲仇士良所殺

儼成美子王宣城

右敬宗子

莊恪太子永太和四年封魯王六年立爲皇太子開成

元年暴薨追贈

蔣王宗儉開成二年封

右文宗子

杞王峻開成五年封

益王峴會昌六年封

兗王岐會昌六年封

德王懌會昌六年封

昌王嵯會昌六年封

右武宗子

靖懷太子漢會昌六年封雍王太中六年薨追諡

雅王涇大中元年封

通王滋會昌六年封昭宗時爲韓建劉季述所殺

慶王沂會昌六年封大中十四年薨

濮王澤大中二年封

鄂王潤大中五年封乾符三年薨

懷王洽大中八年封

昭王泚大中八年封乾符三年薨

康王汶大中八年封乾符四年薨

廣王灃大中十一年封乾符四年薨

衛王灌大中十一年封十四年薨

右宣宗子

魏王侑咸通三年封

涼王佺咸通三年封乾符六年薨

蜀王侏咸通六年封

威王侃咸通六年封

吉王保咸通十三年封

恭哀太子倚初封睦王後爲劉季述所殺天復初追贈

右懿宗子

建王震中和元年封

益王昇光啓三年封

右僖宗子

德王裕大順二年封乾寧四年立爲皇太子劉季述等

幽昭宗立裕爲帝昭宗反正復爲王後爲朱温所殺

棣王禕乾寧元年封

景王祕乾寧四年封

處王禊乾寧元年封

初王祺乾寧四年封

沂王禔乾寧元年封

雅王禎光化元年封

遂王禕乾寧四年封

乾隆十二年校刊

封建十七

瓊王祥光化元年封八王並爲朱溫所殺

端王禎天祐元年封

豐王祁天祐元年封

和王福天祐元年封

登王禧天祐元年封

嘉王祐天祐元年封

潁王禔天祐二年封

蔡王祐天祐二年封

右昭宗子

唐制親王封戶八百增至千公主三百長公主只六百

高宗時沛英豫三王太平公主武后所生戶始踰制垂拱中太平至千二百戶聖歷初相王太平皆三千壽春等五王各三百神龍初相王太平至五千衛王三千溫王二千壽春等主皆七百嗣雍衡陽臨淄巴陵中山王五百安樂公主二千長寧千五百宣城宣城宣安各千相王女爲縣主各三百相王增至七千安樂三千長寧二千五百宣城以下二千相王太平長寧安樂以七丁爲限雖水旱不蠲以國租庸滿之中宗遺詔雍壽春王進爲親王戶千開元後天子敦睦兄弟故寧王戶至五千五百岐薛五千申王以外家微戶四千邠王千八百

帝妹戶千中宗諸女亦如之通以三丁爲限及皇子封王戶二千公主五百咸宜公主以母惠妃故封至千自是諸公主例千戶止

唐史贊曰唐自中葉宗室子孫多在京師幼者或不出閤雖以國王之貴與匹夫不異故無赫赫過惡亦不能爲王室軒輊運極不還與唐俱殫然則歷數短長自有底止彼漢七國晉八王不得其效愈速禍云

肅宗嘗問於李鄴侯泌曰今郭子儀李光弼已爲宰相若克兩京平四海則無官以賞之柰何對曰古者

官以任能爵以酬功漢魏以來雖以州郡治民然有功則錫以茅土傳之子孫至於周隋皆然唐初未得關東故封爵皆設虛名其食實封者給繒布而已貞觀初太宗欲復古制大臣議論不同而止由是賞功多以官夫以官賞功有二害非才則廢事權重則難制是以功臣居大官者皆不爲子孫遠慮務乘一時之權邀利無所不爲向使祿山有百里之國則亦惜之以傳子孫不反矣爲今之計俟天下旣平莫若疏爵土以賞功臣則雖大國不過二三百里可比今之小郡豈難制哉於人臣乃萬世之利也上曰善按如

鄴侯之說則知唐之所謂爵土祇是虛名且無承襲蓋受封者於內府給繒布不得以自食其所封之地則只同俸賜不可以言胙土矣故今叙唐之封建只及諸王而凌烟功臣以下之封公侯者更不叙錄蓋既無胙土世襲之事則封建之規模盡失矣

唐初如英衛之類其子尚襲封至中葉以後則此制盡廢

如狄仁傑封梁公子光嗣未嘗襲梁公張說封燕公子均未嘗襲燕公

又按唐會

要神龍二年七月制功臣段志元屈突通蕭瑀李靖秦叔寶長孫順德劉弘基宇文士及錢九隴程知節龐卿暉竇滌苑君璋李子和張平高張公謹梁恪仁

安修仁秦行師獨孤卿雲蘇定方李安遠鄭仁泰杜君綽李孟嘗等二十五家所食實封並依舊給可見當時所給實封繒布止受封者之身如此二十五家則特旨依舊支給耳非通例也

唐天寶以後藩鎮

按唐自中葉以來皇子弟之封王者不出閭諸臣之封公侯者不世襲封建之制已盡廢矣至肅代而後則強藩私其土地甲兵而世守之同於列國故取唐書藩鎮傳述諸鎮傳授之次第以繼諸王之後

唐書藩鎮傳叙曰安史亂天下至肅宗大難略平君臣皆幸安故瓜分河北地付授叛將護養孽萌以成禍根亂人乘之遂擅署吏以賦稅自私不朝獻於廷效戰國肱髀相依以土地傳子孫脇百姓加鋸其頸利怵逆汗遂使其人自視猶羌狄然一寇死一賊生訖唐亡百餘年卒不爲王土當其盛時蔡附齊連內裂河南地爲合從以抗天子杜牧至以山東王不得不王霸不得不霸賊得之故天下不安又曰厥今天下何如哉干戈朽鐵鉞鈍含忍混貸昭育逆孽殆爲故常而執事大人曾不歷

算周思以爲宿謀方且嵬岸抑揚自以爲廣大繁昌莫己若也嗚呼其不知乎其俟偃蹇顛傾而後爲之支計乎且天下幾里列郡幾所自河以北蟠城數百角奔爲寇伺吾人顛頓天時不利則將與朋伍駭亂吾民於掌股之上今者及吾之壯不圖擒取乃偷取恬逸以爲後世子孫背脅疽根此復何也議者曰倔强之徒吾以良將勁兵爲銜策高位美爵充飽其腸安而不撓外而不拘猶豢虎狼而不拂其心則忿氣不萌此大歷貞元所以守邦也何必疾戰焚煎吾民然後爲快也愚曰大歷貞

元之間有城數十千百卒夫則朝廷貸以法故於是濶視大言自樹一家破制削法角爲尊奢天子不問有司不呵王侯通爵越錄受之覲聘不來几杖扶之逆息虜允皇子嬪之地益廣兵益強僭擬益甚侈心益昌土田名器分畫大盡而賊夫貪心大及畔岸淫名越號走兵四略以飽其志趙魏燕齊同日而起梁蔡吳蜀躡而和之其餘混傾軒囂欲相效者往往而是運遭孝武前英後傑夕思朝議故能大者誅鋤小者惠來大抵生人油然多欲欲而不得則怒怒則爭亂隨之是以教答於家刑

罰於國伐於天下裁其欲而塞其爭也大歷貞元之間反此提區區之有而塞無涯之爭是以首尾指支幾不能相運掉也凡今者不知非此而反用以爲經將見爲盜者非止於河北而已嗚呼大歷貞元守邦之術永戒之哉魏博傳五世至田弘正入朝十年復亂更四姓傳十世有州七成德更二姓傳五世至王承元入朝明年王庭湊反傳六世有州四盧龍更三姓傳五世至劉總入朝六月朱克融反傳十二世有州九淄青傳五世而滅有州十二滄景傳三世至程權入朝十六年而李全略

有之至其子同捷而滅有州四宣武傳四世而滅
有州四彰義傳三世而滅有州三澤潞傳三世而
滅有州五雖然迹其由來事有因藉地之輕重視
人謀臧否歟今取擅興若世嗣者爲藩鎮傳若田
弘正張孝忠等暴忠納誠以屏王室自如別傳云
田承嗣平州盧龍人本隸安祿山麾下郭子儀平東都
來降俄復叛後再降於僕固懷恩遷貝博滄瀛等州節
度使名其軍曰天雄加同平章事封鴈門郡王 悅承
嗣弟子承嗣卒爲留後俄遷節度使德宗立悅舉兵反
僭號魏王朱泚篡逆帝乃下詔赦悅罪悅復順命封濟

陽郡王後爲其從弟緒所殺 緒承嗣第六子旣殺悅
爲留後請命乃卽命爲節度使加同平章事封鴈門郡
王卒 季安緒少子緒旣死爲留後因授節度使加同
平章事 懷諫季安子嗣爲留後軍中廢之而立弘正
送懷諫京師自承嗣至懷諫四世凡四十九年 弘正
承嗣從子爲衙內兵馬使軍中旣廢懷諫脅立弘正弘
正乃舉六州版籍請吏於朝詔除節度使以討王承宗
李師道功加同平章事入朝移鎮成德軍亂遇害 布
弘正子爲河陽節度使會魏博節度李愬病不能軍乃
詔布鎮魏博牙將史憲誠怵軍中脅布叛布不從自殺

史憲誠本奚人三世爲魏博將田布旣自殺憲誠擅
總軍務穆宗因授以節度使進同平章事後請納地
欲分相衛請置帥軍中攻殺之憲成起至卒凡七年
何進滔靈武人世爲魏軍校史憲誠旣死軍中推爲
留後進滔乃斬作亂者數十人請命詔授節度使後
進同平章事卒 重順進滔子進滔旣死爲留後就
加節度使後進同平章事卒 全皞重順子嗣拜節
度使以平龐勳功進同平章事後軍衆叛而殺之自
進滔至全皞二世四十二年

韓君雄魏州人全皞死軍中推君雄總軍事加節度
使同平章事卒子簡襲留後遷節度使平章事封魏
郡王時黃巢亂帝在蜀簡北略邢洛東攻鄆兵敗未
幾死 君雄簡凡再世十二年

樂彥禎魏人韓簡時澶州刺史簡卒魏人立之進節
度使加同平章事後軍亂殺彥禎彥禎起至殺凡七
年

羅弘信魏州人爲裨將軍中旣殺彥禎推大將趙文
珩總留後彥禎子從訓求救於朱全忠以兵討之衆
懼殺文珩推弘信爲主詔擢留後遷節度使平章事
封臨清郡王後爲朱全忠李克用所攻拔其三州卒

子紹威襲昭宗時授節度使爲劉仁恭所攻朱全忠救之遂事全忠加侍中封魏王與全忠謀盡誅魏牙兵以除逼紹威自此勢弱爲全忠所取

右魏博據七州

貝博魏相
衛磁洛

傳五姓

李寶臣本范陽內屬奚爲安祿山射生慶緒時爲恒州刺史來降詔授故官封密雲郡公後復叛事史思明思明死乃挈恒趙深定易五州以獻封趙國公名其軍曰成德拜節度使封隴西郡王拜同平章事後爲妖人所毒死 惟岳寶臣子寶臣死軍中推爲留後求襲父位德宗不許趣護喪京師以張孝忠代之惟岳拒命詔朱

滔等討之其將王武俊殺惟岳以降

王武俊本出契丹爲李寶臣裨將李惟岳旣死武俊遣使請命詔授武俊恒冀觀察使而惟岳將楊政義等以深定二州來降武俊怨不得節度又失二州乃反僭號趙王興元初乃黜僞號請命詔授節度使加同平章事以破朱滔功封清河郡王卒 士真武俊長子嗣爲節度使拜同平章事卒 承宗士真子初爲副大使憲宗卽位欲析鎮藩遣使諭承宗承宗乃上德棣二州詔以薛昌朝爲保信軍節度使統德棣承宗拒命却昌朝囚之帝怒削承宗官爵遣兵討之

久無功而淄青盧龍數表請赦承宗乃罷兵盡以故地畀之承宗復拒命出兵掠鄰鄙爲吳元濟平乃恐遣二子入侍歸德棣二州詔復官爵卒軍中推其弟承元爲留後承元不敢請命於朝詔以爲義承軍節度使 廷湊本回紇阿布思之族爲武俊養子世爲裨將承元旣以成德軍請命後詔以田弘正爲節度使庭湊以軍作亂害弘正白稱留後脅監軍表請節又取冀州穆宗怒詔弘正子布以魏博兵討之會魏博軍變布死乃赦庭湊庭湊復拒命討之無功後庭湊上書謝表上景州穆宗厭兵赦之復其官爵封太

原郡公卒 元達庭湊次子庭湊死軍中以元達請命詔襲節度使以討劉稹功加同平章事太原郡公卒 紹懿元達次子嗣爲節度使遷尚書左僕射卒 紹懿元達次子嗣爲留後封太原縣伯加檢校司空卒 景崇紹鼎子嗣爲節度使以討龐勳功進檢校尚書右僕射同平章事常山王卒 鎔景崇子嗣爲節度爲李克用所擊兵敗與克用和後復附於朱全忠全忠旣篡封鎔趙王全忠謀取河北鎔附克用後爲其將張文禮所殺滅王氏之族文禮自爲留後李存勗討而誅之自廷湊至鎔凡百年

右鎮冀據六州

恒定易趙深冀傳二姓

李懷仙柳城胡爲安祿山裨將史朝義以爲幽州節度使朝義敗懷仙使其將李抱忠奉其首來降卽授幽州盧龍節度使封武威郡王大歷三年爲其麾下朱希彩朱泚及弟滔所殺族其家

朱希彩幽州昌平人旣與泚滔殺懷仙自稱留後代宗赦其罪詔宰相王縉爲節度使以希彩副之縉至鎮度希彩不可制勞軍卽還乃授希彩節度使封高密郡王七年爲其下所殺泚希彩同宗軍衆旣殺希彩推爲留後詔卽拜節度使封懷寧郡王後入朝

留京師 滔泚弟泚旣入朝滔攝留後泚留京師滔遂領節度討李惟岳取深州德宗賜以德棣二州以康自知爲深趙二州團練使滔失深州不平乃與王武俊等同叛僭號冀王武俊說推滔爲盟主涇原軍變泚僭逆武俊等乃叛滔攻之泚旣誅滔兵復敗上書待罪詔洗釁與更始未幾卒

劉忬幽州昌平人朱滔時積功至雄武軍使滔死軍中推忬總軍事詔爲節度使彭城郡公卒 濟忬子忬嗣節度累遷同平章事以討王承宗功進中書令爲其子總所毒死 總濟次子旣毒其父卽領軍政

詔嗣節度封楚國公進同平章事會吳元濟李師道平總恐乃用譚忠謀上疏願奉朝請髡髮爲浮屠詔張弘靖領其軍總入朝至定州卒

朱克融滔族孫以偏校隨劉總入朝留京師久不得調詣宰相求自試不聽無聊怨忿張弘靖赴鎮從還幽州軍變囚弘靖推克融領軍務時朝廷方討王庭湊薄克融罪就拜節度遷司空吳興郡王後軍亂殺克融子延嗣領留後大將李載義殺而代之族其家李載義自稱恒山愍王之後爲幽州牙中兵馬使朱克融死子延立叛命殘虐載義率衆殺之敬宗授載

義節度使封武威郡王以討賊功進同平章事後爲兵馬使楊志誠所逐入朝爲山南節度使

楊志誠爲載義牙將逐載義自爲留後詔以爲節度副使遷尚書右僕射後爲其下所逐推部將史元忠總留後詔以爲副大使會昌初爲偏將陳行泰所殺行泰邀節制未報次將張絳殺之

張仲武范陽人爲雄武軍使遣其屬入朝請擊回鶻自效會張絳殺陳行泰求節宰相李德裕請用仲武乃以爲留後絳果爲軍所逐以破回鶻等功遷進節度使同平章事卒子直方嗣爲留後俄進副大使直

方舉動多不法畏下變起乃奔京師詔以爲金吾將軍後爲黃巢所殺

張允伸范陽人爲都知兵馬使直方出奔衆推爲留後俄遷節度使同平章事燕國公卒

張公素范陽人爲別將事允伸允伸死表其子簡會爲留後公素以兵來會喪軍士附之簡會乃出奔詔公素爲節度使進同平章事後爲李茂勳所襲奔京師

李茂勳本回鶻阿布思之裔來降賜姓爲燕將誣納降軍使陳貢言反襲殺之因舉兵入府茂勳逃衆推

主州務以聞卽拜節度使卒子可舉嗣爲節度使遷太尉後爲其將李全忠所攻自燔死

李全忠范陽人爲牙將攻可舉殺之爲留後拜節度使卒子匡威領留後進爲使後爲弟匡籌所逐奔趙謀取王鎔趙人殺之 匡籌旣逐兄匡威自爲留後

詔授節度使後爲李克用所攻兵敗挈其族奔京師次景城爲盧彥威所殺克用遂取幽州以劉仁恭爲帥

劉仁恭深州人世爲鎮將有功李匡籌逐其兄戍卒推仁恭趨幽州匡籌逆戰敗之仁恭乃奔太原李克

用用其計攻匡籌取幽州表仁恭爲節度使後叛克
用克用擊之不利仁恭獻捷於朱全忠全忠表爲同
平章事以兵取滄景德三州後爲其子守光所囚晉
王存勗討守光取幽州誅仁恭 守光旣囚仁恭自
爲盧龍節度使益驕侈僭號大燕皇帝晉遣兵討平
之誅守光

右盧龍據九州

傳八姓

李正己本高麗人爲營州副將從侯希逸入青州以軍
候從討史朝義有功後逐希逸出之詔代爲節度使進
同平章事饒陽郡王建中初與田悅皆叛卒子納父死

自爲留後與李希烈朱滔等連和僭號齊王興元初乃
歸命加同平章事封隴西郡王卒子師古嗣爲節度使
加同平章事卒弟師道嗣爲留後遷副大使時方討淮
蔡師道陰使人殺宰相焚河陰漕院爲蔡聲援蔡平乃
遣使請納三州旣而復拒命詔討之師道兵屢敗爲其
將劉悟所殺傳首京師

右淄青據十二州

淄青齊海登萊
沂密曹濮兗鄆

一姓四傳

程日華定州安喜人爲張孝忠牙將奉使至滄州會軍
變殺刺史李固烈逼日華領州事時朱滔王武俊等叛
招日華不從遂攻之日華乘城自固遣使自歸天子德

宗喜拜日華御史大夫滄州刺史置橫海軍就以爲使
卒子懷直嗣爲留後遷節度使卒子權嗣領軍務拜節
度使累封至邢國公及淮西平請入朝辭軍政詔華州
刺史鄭權代之

李全略本王武俊之裨將入朝授代州刺史程權入
朝以鄭權代爲橫海節度使權遷以烏重允代之重
允遷以杜叔良代之叔良討王廷湊兵敗乃命全略
爲節度使卒子同捷領留後賂鄰藩爲請領父節不
許同捷拒命詔討之同捷兵敗伏誅

右滄景據四州

滄景德棣傳二姓

劉元佐滑州匡城人爲永平軍牙將李靈耀據汴州反
元佐乘其無備襲取宋州德宗建中初充宋毫潁節度
使以討李汭等功遷同平章事後爲假子樂士朝所鳩
死子士寧嗣初元佐死朝命吳湊代之軍中不受命推
士寧爲留後請命詔襲節度使後爲其大將李萬榮爲
逐萬榮爲留後遷節度使卒以兵屬鄧惟恭惟恭乃執
萬榮子廼送京師以董晉代爲節度使

右宣武據四州

汴宋毫潁

傳二姓

吳少誠幽州潞人爲李希烈將希烈僭逆爲陳仙奇所
毒夷其妻子函首獻朝詔以仙奇爲淮西節度使少誠

殺仙奇德宗因授少誠申蔡光等州節度觀察留後進
拜節度使後拒命圍許州詔削奪官爵討之師不利乃
赦其罪順帝卽位進同平章事封濮陽郡王卒 少陽
本滄海清池人與少誠同在軍友善少誠養爲弟少誠
死少陽殺其子元慶自稱留後詔拜節度使卒 元濟
少陽子少陽死匿不發喪請於朝求世襲不許乃出兵
反詔諸路軍討之李愬入蔡城俘元濟朝於京師

右彰義據三州

申光

一姓三世

劉悟其祖正臣平盧節度使悟事李師道爲將師道拒
命王師討之師道以悟將兵拒守復疑悟悟乃還兵取

鄆殺師道傳首京師拜義成節度使彭城郡王兼幽鎮
招討使治邢州進同平章事卒子從諫領留後請命拜
節度使入朝還鎮進同平章事卒 稹從諫從子從諫
旣卒擅領留後武帝詔稹護喪還鎮稹拒命詔討之稹
兵敗其大將郭誼等殺之以降

右澤潞據五州

鄆邢潞

一姓三世

李茂貞深州博野人本姓宋爲軍卒戍鳳翔隸鄭畋破
黃巢以功積遷至武定軍節度使會鳳翔節度使李昌
符與天威都頭楊守爭立以兵相攻僖宗遣茂貞擊殺
昌符就以茂貞爲鳳翔隴右節度使封隴西郡王昭宗

時擅以兵攻興元節度使楊守亮取其地詔徙茂貞山南節度以徐彥命鎮鳳翔茂貞不奉詔表辭不遜帝討之兵敗茂貞遂犯京師脅上誅杜讓能等乃還後與韓建王行瑜等舉兵犯京師李克用舉兵討之乃退後封岐王昭宗爲宦官所廢既反正宰相崔允欲借朱全忠兵誅宦官中尉韓全誨等劫帝幸鳳翔全忠圍之逾年茂貞與和帝乃出茂貞初破楊守亮取興元而邠寧鄜坊皆附之有地二十州其被梁圍也興元入於蜀開平已後邠寧鄜坊入於梁秦鳳階成又入於蜀當梁末年所有惟七州而已莊宗破梁遣子入朝改封秦王卒

從曦茂貞子茂貞卒嗣爲鳳翔節度使

右鳳翔據二十州

岐隴涇原渭武秦成階鳳邠寧慶行鄜坊丹延梁洋

二傳

李仁福不知其世家當唐僖宗時有拓跋思敬者爲夏州偏將後以預破黃巢功賜姓李氏拜夏州節度使思敬卒以弟思諫爲節度使自唐末天下大亂興元鳳翔邠寧鄜坊河中同華諸鎮之兵四面並起而交爭獨靈夏未嘗爲唐患亦無大功故其世次功過不顯而無傳梁開平初思諫卒軍中立其子彝昌爲留後拜節度使明年其將高宗益作亂殺彝昌時仁福爲蕃部指揮使軍中乃迎仁福立之不知其於思諫爲親疏也奉梁正

朔拜節度使中書令封朔方王卒子彝超自爲留後唐明帝徙彝超延州刺史以安從進爲夏州節度使彝超拒命唐遣兵圍夏州不克乃釋之以彝超爲節度使卒弟彝興嗣封西平王周加太傅宋興加太尉卒追封夏王子克獻立襲靜難節度使卒贈侍中子繼筠立踰年卒弟繼捧立太平興國七年來朝以夏銀綏宥靜五州地來歸其弟繼遷居銀州率衆爲寇奔入蕃族詔以繼捧爲定難節度賜姓名趙保忠令招繼遷保忠言繼遷歸欵以爲銀州刺史賜姓趙保吉後保吉與保忠合寇靈州詔討之保吉併保忠之衆保忠遁還闕詔隳夏州

居民悉遷於綏銀等州削保吉所賜姓名復爲李繼遷遣使入貢後復入寇窺靈州詔李繼隆以五路兵攻之大小數十戰繼遷遁去太宗崩乃遣使修貢求領蕃任真宗復賜姓名拜定難軍節度使後復入寇陷靈州爲其番部射死子德明入貢上表歸欵拜定難節度使西平王進封夏王卒子元昊嗣景祐初入寇後攻唃廝囉陷瓜沙肅三州盡得河西之地寶元元年僭號改元詔削奪元昊官爵遣兵討之慶歷四年乃遣使稱臣冊爲夏國主歲賜銀絹茶綵共二十五萬五千仍聽市易卒子諒祚立治平三年入寇明年种諤取綏州城之諒祚

卒子秉常立元豐四年遣李憲等五路兵攻之取四砦
城永樂夏人陷之秉常卒子乾順立元祐時來請所侵
地并送還永樂陷没人口詔還其米脂安強浮圖葭蘆
四砦紹聖後章惇為相遣師伐之夏人亦歲歲寇邊初
夏國恃橫山諸族帳強勁善戰故用以抗中國種諤謀
取橫山故興靈州之師及王師失利李憲始獻進築之
策神宗厭兵不克行童貫舊常從憲得其髣髴故獻議
進築遂領六路邊事將諸路兵六七年進築軍壘建立
保砦遂得橫山之地夏人失所恃遂納款夏國自此少
衰矣會金滅遼乾順以事遼之禮事金金人以天德雲

中金肅河清四軍及八館之地賂之未幾復奪其地建
炎時遣使入夏乾順已僭稱制待使倨自後始用敵國
禮張浚吳玠遣使約夏夾攻金卒無成說紹興九年李
顯忠自夏來歸是年乾順卒子天祈立嘉定間金遷汴
有西都長安之意宿重兵於鞏州夏畏之遣使來議夾
攻四川宣闡安丙從之遣董炤等攻鞏州不利

繼乾順而立者

正史作天祈建炎以來朝野雜記作仁孝未知孰是自
乾順之死至嘉定甲申凡八十餘年其後立者決非一
主并夏亡之歲月
正史不載當續考

右靈夏據五州

夏銀綬
宥靜

唐末藩鎮

按唐末宇內皆爲節鎮而所謂節鎮者非士卒殺主帥則盜賊逐牧守朝廷不能討因而命之大槩皆欲互相噬吞廣自封殖以爲子孫傳襲之計江淮以南之蠶起者其地非英雄所必爭又值中州多故無暇遠略故皆能傳世而北方節鎮其驟興忽敗不能以一世多爲宣武河東所併獨鳳翔之初起也據地最多故能崛起汴晉之間相爲長雄後雖日削而傳襲亦及再世靈夏僻在一隅據五州之地世事中朝及宋興四方僭僞節鎮悉已削平獨不能取其地蓋自繼遷以來效化外蕃戎之俗獷悍難制雖繼以女真之強暴而亦能自存傳世三百餘年然其地則唐之地而其初亦唐之節鎮也故叙鳳翔靈夏以繼唐史藩鎮傳所載八鎮之後

先公曰嗚呼宇宙之爲天下裂豈一朝一夕之故哉太宗初置沿邊節度使天寶十載分西北十節度大率以其兵防邊耳固未嘗有世襲之節度也自安史亂而後河北三鎮有世襲之節度然猶未有東南之世襲節度也自黃巢亂而後東南徧海內皆爲世襲節鎮矣五代十國皆節鎮之流裔而

并合者也自宣武併河中魏博淄青成德澤州而為梁自河東據潞州而為晉然後吳以淮南越以鎮海閩以威武楚以武安靜江南漢以清海岐以鳳翔邠寧蜀以兩川而燕之盧龍荆之荆南亦併出焉

楊行密廬州合肥人以盜見獲為兵遷隊將逐廬州刺史據其州詔就拜刺史淮南節度使高駢為畢師鐸等所攻行密擊之取揚州後取宣潤滁和等州唐拜行密淮南節度使同平章事行密遣兵攻取自淮以南江以東諸州皆下之進拜中書令吳王卒子渥嗣後為徐溫

張顥等所殺弟隆演嗣即吳王位改元卒弟溥立僭即皇帝位後禪位於徐知誥

右淮南傳四世四十六年

行密以唐景福元年入揚州至溥以晉天福二

年為李氏所篡

王建許州舞陽人為忠武軍卒遷隊將隸軍將鹿宴弘僖宗在蜀以兵隨駕扈從有功遷璧州刺史以兵取閬利梓等州逐西川節度使韋昭度而代之又攻成都殺陳敬暄田令孜乃以建為西川節度使復攻東川取之并有兩川山南之地封蜀王梁篡唐建乃僭號皇帝卒子衍嗣立唐莊宗既滅梁乃遣兵伐蜀取之衍降見殺

右前蜀二世三十五年

建以唐大順二年為西川節度使至衍以後唐同光

三年七

孟知祥邢州龍岡人仕晉為左教練使遷太原尹莊宗既滅王衍乃以知祥為劔南西川節度副大使明宗立知祥陰有據蜀之志殺監軍李嚴與東川節度使董璋俱反唐師討之不利知祥遂攻東川殺董璋取其地乃遣使入朝唐封為蜀王唐明宗崩知祥僭號皇帝後復取山南之地卒子景嗣時中國多故雄武軍節度使何建以秦成階三州附於蜀景又取鳳州盡得王衍故地周世宗時伐蜀取秦成階鳳宋乾德三年遣師伐蜀取

之景降封秦國公卒

右後蜀二世四十一年

知祥以後唐同光三年為節度使至景以宋乾德三

年

劉隱其祖安仁上蔡人後徙閩中商賈南海因家焉父謙為廣州牙將黃巢寇廣廣州表謙為封州刺史賀江鎮遏使以禦梧桂謙卒表隱代之會廣州節度劉崇龜死將盧琚等作亂隱以封州兵討殺琚迎節度使嗣薛王知柔徐彥若代知柔表隱節度副使彥若卒軍中推隱為留後天祐時拜節度使梁初進太師封南平王卒弟龔嗣以兵取潮韶及容管邕管僭號皇帝卒子玠嗣

立後爲其弟晟所弑晟旣弑玢遂自立值馬氏政亂乃出兵攻楚克桂宜嚴梧蒙五州又取柳州卒子銀嗣立宋開寶四年遣師伐南漢取之銀降封恩赦侯

右南漢五世六十七年

隱以唐天祐二年爲廣州節度使至銀以宋開寶四

七年

馬殷許州鄆陵人初爲孫儒裨將儒攻宣州敗死殷與其下推劉建峰爲主轉攻豫章虔吉入湖南取潭州建峰自稱留後僖宗因授之建峰爲其下所殺軍司馬張佶率衆推殷爲主拜潭州刺史殷攻連邵郴衡道永六州皆下之又取桂州拜武安軍節度使梁時拜中書令

封楚王又取嶺南昭賀梧蒙龔富等州澧潋辰州皆附於殷拜天冊上將軍唐滅梁殷入貢仍封爵卒子希聲立授武安靜江等軍節度使卒追封衡陽王弟希範立卒弟希廣立爲其兄希萼所攻兵敗自縊死希萼旣殺希廣遂自立臣於李景其將徐威等作亂執希萼立其弟希崇彭師鬲等復奉希萼爲衡山王臣於李景希崇亦請命於景景遣邊鎬將兵入楚盡遷馬氏之族於金陵

周行逢武陵人與王進達俱爲靜江軍卒事希萼進達攻唐將邊鎬逐之行逢復破唐兵進達奉表京師

周太祖以為武安節度使以劉言為武平節度使進
達與言有隙行逢為畫謀龔殺言進達據武陵行逢
據潭州會進達為潘叔嗣所殺行逢殺叔嗣取武陵
卒子保權立衡州刺史張文表畔之保權遣使請命
太祖命慕容延釗討之保權舉族朝於京師

右湖南馬氏五世五十七年

殷自唐乾寧三年有湖南至希萼以周廣

順元年為南唐所滅

周氏再世十年

行逢以周顯德元年拜節度使至保權以宋乾

德元年納土

錢鏐杭州臨安人始為石鏡鎮將董昌偏裨擊黃巢有功為都將擊劉漢宏破越州昌徙居越而鏐為杭州刺

史擊取蘇常潤等州進鎮海節度使同平章事昌僭逆鏐討平之盡有兩浙之地拜中書令越王梁時封吳越王尚父卒子元瓘立卒子佐立破李景兵福州卒弟俶立太平興國三年俶入覲盡獻其地

右兩浙四世八十四年

鏐以唐乾寧二年為鎮海鎮東軍節度使有兩浙至

俶以宋太平興國三年納土

王潮光州固始人初為縣史壽州人王緒攻陷固始以潮為軍校緒為秦宗權所攻率眾南奔自南康入汀陷漳浦緒性忌多殺潮與其前鋒將執緒殺之推潮為主授泉州刺史攻福州克之授福建觀察使卒弟審知立

授威武軍節度使同平章事封瑯琊王梁時封為閩王
卒子延翰立後為其弟延稟延鈞所殺延鈞既殺延翰
更名鱗自立後唐拜為節度使閩王後僭號皇帝為其
子繼鵬及李傲所弑繼鵬立更名景遣使朝貢於晉後
為王延羲所殺延羲審知少子嗣立更名曦後為其臣
連重遇所殺 延政審知子初為建州刺史曦淫虐延
政數諫之曦怒攻延政兵敗延政乃以建州建國稱殷
明年曦遇弑連重遇立朱文進盡殺王氏子孫稱晉年
號重遇復殺文進南唐李景聞閩亂發兵攻之遂取閩
遷延政之族於金陵

右福建六世五十五年

潮以唐景福元年入福州
拜觀察使至延政以晉開

運三年為
李唐所殺

高季興陝州硤石人初為汴人李讓家僮朱溫鎮宣武
事溫梁開平初拜荆南節度均王時阻兵自守均王優
容之封為渤海王梁亡朝唐莊宗明帝時取夔萬歸峽
等州臣於吳卒子從誨立復臣唐封南平王卒子保融
立襲封南平王卒弟保勗立卒兄子繼冲立建隆四年
太祖詔慕容延釗討湖南張文表假道荆南入其郛繼
冲懼以地內附舉族入朝

右南平五世凡五十七年

季興以梁開平元年鎮
南至繼冲以宋乾德元

乾隆十二年校刊

文獻通考卷三百七 封建十七

年納
土

按唐末五代以來八國其初亦皆世襲節鎮也故
叙其興滅之歲月傳授之世次附於唐方鎮之後
或曰五代史之十國世家卽晉書十六國載記之
流也何十六國獨無述乎曰十六國乃夷狄之據
地而欲自爲帝王者也未嘗受命於晉難以藩方
目之故除張李二涼之外不復錄若此八國則雖
出於卒伍盜賊然其竊地之初皆常請命於天子
而昇以旌節矣後雖僭號而其源則藩侯也故叙
之若南唐受禪於楊氏北漢繼世於河東則其初

卽稱帝是以亦不復錄云

文獻通考卷第二百七十六

文獻通考卷第二百七十七

鄱陽馬端臨貴與著

封建考十八

五代諸王

梁親王

廣王全昱太祖兄也太祖受禪封貞明二年卒

友諒全昱子初封衡王後嗣廣王坐弟友能反廢囚
京師唐師入汴見殺

友能昱子封惠王後爲宋滑二州留後舉兵反敗死
友誨昱子封邵王坐友能反廢後爲唐兵所殺

安王友寧太祖兄存子受禪後封

密王友倫太祖兄存子受禪後封

彬王友裕太祖子爲忠武節度使卒受禪後追封

博王友文本姓康名勒太祖養以爲子受禪後封郢王

友珪弒逆並殺友文

郢王友珪太祖子受禪後封乾化二年弒太祖篡位均

王以兵討之自殺追廢爲庶人

福王友璋太祖子受禪後封

賀王友雍太祖子受禪後封

建王友徵太祖子受禪後封

康王友孜太祖子末帝卽位後封後以反誅

唐親王

邕王存美太祖子同光三年封莊宗敗不知所終

永王存霸太祖子同光三年封莊宗敗爲軍卒所殺

薛王存禮太祖子同光三年封莊宗敗不知所終

申王存渥太祖子同光三年封莊宗敗與劉皇后同奔

太原爲部下所殺

睦王存義太祖子同光三年封後以郭崇韜壻爲莊宗
所殺

通王存確太祖子同光三年封莊宗敗爲霍彥威所殺

雅王存紀太祖子同光三年封莊宗敗爲霍彥威所殺
魏王繼岌莊宗長子同光三年封將兵伐蜀取之師回
至渭南聞莊宗敗師徒潰散自縊死

繼渾 繼嵩 繼蟾 繼曉並莊宗子同光三年拜光

祿大夫檢校司徒未封莊宗敗並不知所終

秦王從榮明宗子長興元年封後舉兵反敗死廢爲庶
人

許王從益明宗子長興四年封晉天福四年封郟國公
爲二王後奉唐帝祀開運三年契丹犯京師復封許王
尋爲番將蕭翰立爲帝知南朝軍國事漢高祖入洛遇

害

雍王重美末帝子清泰三年封晉兵入與末帝俱自焚
死

洋王從璋明宗從子長興四年封晉時降封隴西郡公
兗王從溫明宗從子晉時爲忠武軍節度使

涇王從敏明宗從子晉時降封秦國公

晉親王

韓王敬暉高祖弟爲曹州防禦使卒天福八年追封子
曦嗣

楚王重信高祖子天福初爲河陽三城節度使范延光

反遇害追封

陳王重景高祖子蚤卒追封

壽王重義高祖子張從賓反遇害追封

漢親王

魏王承訓高祖子蚤卒追封

陳王承勳高祖子隱帝卽位爲開封尹周廣順元年追封

周親王

郟王侗太祖子漢末遇害顯德時追封

杞王信太祖子漢末遇害顯德時追封

越王宗誼世宗長子漢末遇害顯德時追封

曹王宗讓世宗子顯德六年封

紀王熙謹世宗子顯德六年封宋乾德二年卒

蘄王熙誨世宗子顯德六年封

封爵之差唐制王食邑五千戶郡王國公三千戶開國郡公二千戶縣公千五百戶縣侯千戶伯七百戶子五百戶男三百戶又有食實封者給縑帛每賜爵遞加一級唐末及五代始有特加邑戶而罷實封之給又去縣公之名封侯以郡宋朝沿其制文臣少卿監以上內職崇班以上有封爵丞相學士刺史大將軍諸司使以上

有實封但以增戶數為差不繫爵級邑過其爵則并進爵焉止於開國郡公每加食邑自千戶至二百戶實封自六百戶至百戶皆六等親王重臣或特加有踰千戶者郡公食邑有累加至萬餘者實封至數千者又於王爵之上有國王及西平南平之號皆非常典所加凡加食邑宰相千戶實封四百戶餘降麻官七百戶實封三百戶直學士以上五百戶實封二百戶舍人待制散尚書至少卿監以上實封一百戶食邑三百戶封縣開國男五百戶封子七百戶封伯千戶封郡侯二千戶封公千五百戶以上始加實封惟將相食邑萬戶即開國亦或謙而不就者仁宗慶歷七年郊惟夏竦滿萬戶

中書請封英國公因詔使相未滿萬戶皆得封皇屬有

特封郡公縣公或贈侯者無開國字

侯無開國字在開國郡公之上

寶以來伐國降主及外臣叛命赦不誅者亦封侯皆因

名以著罪焉

開寶四年劉鋹封恩赦侯九年李煜封又違命侯淳化五年趙保忠封宥罪侯

采秦制賜民爵曰公士其王公以下封國之名舊有大

次小三等以為進封之敘然每或封拜又有權升次小

國為大國者

淳化五年九月詔升壽為大國列於晉之下燕之上咸平六年八月故堯王追封安

王升安為大

國景德二年八月故雍王追封鄆王仍升

鄆為大國中

祥符七年五月故舒王追封曹王仍升

曹為大國乾

興元年三月進封鄧景祐中詔春秋秦漢

申冀三大長

公主並升為大國

景祐中詔春秋秦漢

以來下及皇朝所封舊名別分大次小三等以為定制

乾隆十二年校刊

文獻通考卷三百七十七 封建十八

五

焉 太祖時詔晉王太齊王美廷武功郡王德昭朝會班宰

相上太宗太平興國八年詔自今宰相序立宜在親王

上宰相宋琪李昉等頓首言漢法丞相在諸侯王下請

入舊制不許 王府講官有翊善一人直講一人贊讀

二人記室一人又有諸王宮大小教授

宋諸王 王子侯

邕王光濟宣祖長子太祖兄蚤亡建隆三年贈中書令

封邕王

秦王廷美宣祖第四子太祖弟建隆元年授嘉州防禦

使進同平章太宗即位封齊王繼封秦王後以罪降封

涪陵縣公房州安置卒於房陵真宗即位追復官封

廷美十子

德恭為左武衛大將軍封樂平縣公

德隆右武衛大將軍封長寧郡侯

德 贈寧遠軍節度使臨沂郡公

德彝保寧軍節度留後追封信都郡王

德均左監門衛大將軍追封安鄉侯

德欽雲州觀察使追封雲中侯

德潤右羽林將軍追封金城侯

德愿右武衛將軍追封姑城侯

乾隆十二年校刊

卷之三十七 封建十八

六

德存左羽林將軍追封洮陽侯

德文昭武軍節度使東平郡王

夔王光贊宣祖第五子太祖幼弟早卒建隆三年贈侍中追封

右宣祖之世

魏王德昭太祖子乾德二年出閣授貴州防禦使遷同平章事太平興國元年封武功郡王四年以譴自殺贈中書令追封魏王

止齋陳氏曰謹按國史乾德二年以皇子德昭爲貴州防禦使時年十七前代皇子出閣卽封王上

以德昭未冠特殺其禮非舊典也夫貴州屬廣西下州防禦使從五品耳皇子始命以此禮曰天子之元子士也天下無生而貴者也儲君副主猶云士明人有賢行著德乃得貴也先王以家人不憚自貶如此損益教道行矣故國人觀之曰世子將君我而齒我於學然後衆知父子之道君臣之義長幼之節出閣封王後世之夸心也藝祖起百世之後獨追古意自王禮殺而爲防禦使非聖人能之乎紹聖中皇子初命便封國公遂爲故事

惟正德昭長子建寧軍節度使追封同安郡公

從讜惟正子溫州團練使坐罪死贈濟南侯

世程從讜子洛州防禦使贈榮國公

世智從讜子桂州觀察使贈申國公

世繁從讜子袁州防禦使贈信都郡公

惟吉德昭次子早卒

守節惟吉子彰化軍節度留後追封丹陽郡王

守巽惟吉子和州防禦使贈楚國公

守度惟吉子英州團練使贈廬江侯

世延惟吉孫絳州防禦使贈彭城郡公

世靜惟吉孫均州防禦使贈北海郡公

世長惟吉孫解州防禦使贈濟陽郡公

世茂惟吉孫鳳州刺史贈東陽侯

惟忠德昭子早卒

從恪惟忠子贈磁州刺史東萊侯

從藹惟忠子齊州防禦使追封韓國公

世綱惟忠孫澧州刺史贈南康侯

從質惟忠子信州團練使贈博陵侯

從信惟忠子雄州防禦使贈楚國公

惟和德昭子早卒

從審惟和子復州防禦使宣城郡公

從誨台州團練使襄陽侯

岐王德芳太祖子開寶九年出閤授防禦使太平興國中進同平章事六年薨

惟敘德芳子懷州防禦使追封河南侯

從煦惟敘子歸州團練使齊國公

世逸從煦子耀州觀察使贈惠國公

惟憲德芳子資州團練使贈英國公

從演惟憲子登州防禦使贈遂寧侯

從郁惟憲子贈金州觀察使新興侯

世奕惟憲孫永州團練使贈南康侯

惟能德芳子右羽林將軍贈張掖侯

從古惟能子登州觀察使楚國公

從贄惟能子温州團練使贈南陽侯

世瑞惟能子嘉州刺史贈華陰侯

安定郡王從式太祖曾孫岐王德芳次子英國公惟憲之子神宗熙寧元年詔以太祖肇造區夏令中書門下考太宗之屬籍近行尊者一人裂地王之使常從獻於郊廟於是從式最長乃拜彰化軍節度觀察留後封安定郡王薨追封榮王

世清熙寧五年嗣封

世準元豐七年嗣封

世開紹聖元年嗣封

世雄建中靖國元年嗣封

世福崇寧五年嗣封

令盪宣和二年嗣封

令話紹興元年嗣封

令時二年嗣封

令砥五年嗣封

令憲六年嗣封

令諷二十五年嗣封

令衿二十六年嗣封

令德乾道元年嗣封

令檯八年嗣封

子棟淳熙七年嗣封

子彤九年嗣封

子恭慶元元年嗣封

子覲嘉泰二年嗣封

伯栩嘉泰四年嗣封

伯祝嘉定元年嗣封

伯澤八年嗣封

熙寧所封安定郡王從式乃秦王德芳之孫從式薨
乃更封燕王德昭曾孫世清爲嗣安定郡王紹興初
燕秦二王後爭襲封禮部員外郎王居正言燕王太
祖長子其後當襲封議遂定自紹興至嘉定襲封者
並燕王後自孝宗後受封者率自下僚承襲且多癯
老疾病不能起跪嘉定十二年臣僚言自今有該封
襲之人先行下所居州郡審驗委堪拜跪方與保明
申奏仍遣赴都堂察審然後取旨除授或序當承襲
本州宗司見其不能拜跪與特轉一官及一子恩澤
以華其老却於次行內更行選襲從之

秀安僖王子偁太祖六世孫岐王德芳之後德芳生英
國公惟憲惟憲生新興侯從郁從郁生華陰侯世將世
將生東頭供奉官令繪令繪生子偁以舍試合格調嘉
興丞生子是爲孝宗六歲選入宮紹興十四年子偁卒
孝宗旣正儲宮詔贈子偁中書令秀王

伯圭子偁子封滎陽郡王光宗時嗣秀王

既夔伯圭子永興軍節度使開府儀同三司贈新安
郡王

師揆伯圭次子奉國軍節度使贈灃王

師禹伯圭季子保康軍節度使贈和王

信王璩太祖七世孫父子彥高宗紹興四年育孝宗於宮中明年詔再選璩入宮憲聖慈烈皇后以爲己子九年封崇國公五年封恩平郡王孝宗既正儲宮璩始稱皇姪三十年出居紹興府淳熙十四年薨追封信王

右太祖之世

楚王元佐太宗長子初封衛王後徙封楚坐罪廢爲庶人真宗卽位復封爵仁宗初薨

允升元佐子封延安郡王

宗禮允升子虔州觀察使成國公

宗道允升子常州團練使贈高密侯

宗楷允升子康州刺史漢東侯

宗回沂州防禦使漢東郡公

宗默昭州刺史安康侯

宗秀左武衛華陰侯

仲翹允升孫睢州防禦使通義侯

昭成太子元僖太宗次子太平興國七年初封廣平郡王後封許王尹開封淳化三年薨追贈太子

陳王元份太宗子太平興國八年初封冀王景德二年薨追封陳王

允寧元份子武定軍節度使信安郡王

宗敏允寧子文州刺史會稽侯

宗孟允寧子汝州防禦使臨汝侯

允讓元份子知大宗正事汝南郡王贈濮安懿王

宗懿允讓子宿州觀察使和國公

宗詠洪州觀察使豫章侯

宗師密州觀察使高察侯

宗邈隴州防禦使濟陽侯

宗沔洛州防禦使廣平侯

宗望舒州防禦使高密郡公

安王元傑太宗子太平興國八年初封益王咸平六年

薨無子

密王元偓太宗子端拱元年封徐國公真宗卽位封彭城郡王天禧元年封徐王二年薨

曹王元偁太宗子初封涇國公真宗卽位封安定郡王大中祥符七年薨贈曹王

鎮王元儼太宗子景德初封廣陵郡王仁宗卽位拜太尉尚書令天聖七年封鎮王後改荆王慶歷四年薨

允迪元儼子安靜軍節度使贈永嘉郡王

允熙元儼子滁州刺史博平侯

允初元儼子寧國軍節度使贈博平郡王

代國公元億太宗子早薨至道三年追封

嗣濮王宗鄆太宗曾孫安懿王元讓之子英宗之親兄

神宗時嗣封濮王紹聖元年薨

宗晟安懿王子紹聖元年嗣封

宗愈紹聖二年嗣封

宗綽紹聖二年嗣封

宗楚紹聖三年嗣封

宗祐紹聖四年嗣封

宗漢紹聖五年嗣封

仲增安懿王孫大觀三年嗣封

仲御政和五年嗣封

仲爰宣和四年嗣封

仲理靖康時襲封北遷

仲良建炎二年嗣封

仲儻建炎八年嗣封

士儉安懿王曾孫紹興二十五年嗣封

士鞞隆興初嗣封

士歆淳熙時嗣封

不稭安懿王元孫慶元二年嗣封

不豐慶元六年嗣封

不儔開禧三年嗣封

不嫖嘉定十一年嗣封

不凌嘉定十五年嗣封

右太宗之世

按諸侯王與列侯皆以其嫡子嫡孫世襲其所受之封爵自非有罪者與無後者則爵不奪而國不除此法漢以來未之有改也至唐則臣下之封公侯者始止其身而無以子襲封者然親王則子孫襲封如故雖所謂茅土食邑多爲虛名然始受封之國與爵則父歿子繼世世相承如吳王恪曹王

明俱太宗之子受封於貞觀時中更武氏祿山之禍皇族殲夷陵替之餘然其苗裔苟存則嗣吳王嗣曹王尚見於肅代德順之間至宋則皇子之爲王者封爵僅止其身而子孫無問嫡庶不過承蔭入仕爲環衛官廉車節鉞以序而遷如庶姓貴官蔭子入仕之例必須歷任年深齒德稍尊方特封以王爵而其祖父所受之爵則不襲也國朝會要載慶歷四年七月制封宗室乃以皇叔馮翊郡公德文爲東平郡王皇兄允讓爲汝南郡王皇弟允良爲華元郡王皇姪從藹爲潁國公從煦爲安國

公宗說爲祁國公昭成太子孫宗保爲建安郡王
華王孫宗達爲恩平郡王邢王孫宗望爲清源郡
公自燕王薨而祖宗之後未有封王爵者議者以
爲自三代以來皆建宗戚用自承助於是次第封
拜之蓋仁宗鮮兄弟享國旣久又無皇子藝祖太
宗之子爲王者皆已物故是時宗姓幾無一王故
擇其行尊齒宿者王之至濮安懿王以英宗之故
安定郡王以藝祖之故方令世世承襲然又不以
昭穆相承嫡庶爲別每嗣王歿則只擇本宗直下
之行尊者承襲於是濮安懿王有二十七子而得

嗣封者七人四十六孫而得嗣封者亦七人蓋嗣
濮王凡十四人纔更兩代耳安定郡王之後世字
行嗣封者五人令字行嗣封者九人子字行嗣封
者四人伯字行嗣封者三人蓋嗣安定郡王凡二
十一人纔更四代耳此例亦古所無也又按蔡元
道祖宗官制舊典稱皇子生百晬命名初除美軍
額節度使兩遇大禮移鎮再遇封國公出閣拜使
相封郡王納夫人建外第方除兩鎮封王然則皇
子雖在所必王然其遷轉亦有次第不遽封也

周王元祐真宗子咸平五年封信國公六年薨追封王

右真宗之世

褒王昉仁宗子蚤薨追封

豫王昕仁宗子蚤薨追封

鄂王曦仁宗子蚤薨追封

右仁宗之世

吳王顥英宗子初封東陽郡王神宗立封昌王哲宗立徙楚王紹聖初薨

孝騫顥子寧國軍節度使豫章郡王

益王頽英宗子初封樂安郡王進封嘉王元祐三年薨

潤王顏英宗子蚤薨追封

右英宗之世

成王侑神宗子早薨追封

惠王僅神宗子早薨追封

唐王俊神宗子初封永國公薨追封王

褒王伸神宗子蚤薨追封

冀王侗神宗子初封景國公薨追封王

豫王侂神宗子初封建國公薨追封王

徐王侑神宗子蚤薨追封

吳王佖神宗子初封儀國公哲宗即位封太寧郡王徽宗即位封陳王崇寧五年薨

儀王偉神宗子蚤薨追封

燕王俟神宗子初封成國公哲宗卽位封咸寧郡王徽宗時積封至燕王靖康從北狩不知所終

楚王似神宗子初封和國公哲宗卽位封普寧郡王徽宗時封蔡王崇寧五年薨

越王偲神宗子初封祈國公後積封至越王靖康從北狩不知所終

右神宗之世

獻愍太子茂哲宗子早薨初贈越王再贈太子

右哲宗之世

兗王棖徽宗子早薨追封

鄆王楷徽宗子初封魏國公進封高密郡王政和八年策進士居第一積封至鄆王靖康從北狩

荆王楫徽宗子初封楚國公進封南陽郡王崇寧三年薨

肅王樞徽宗子初封吳國公積封至肅王靖康中與張邦昌同質於金國北去

景王杞徽宗子初封冀國公積封至景王靖康從北狩
濟王栩徽宗子初封魯國公積封至濟王靖康從北狩
濟陽郡王棫徽宗子初封楊國公進封濟陽郡王

邠王材徽宗子初封魏國公薨追封

祁王謨徽宗子初封鎮國公積封至祈王靖康從北狩

莘王植徽宗子初封吳國公積封至莘王靖康從北狩

華原郡王朴徽宗子初封雍國公進爵華原郡王

徐王棣徽宗子初封徐國公積封至徐王靖康從北狩

沂王樛徽宗子初封冀國公積封至沂王靖康從北狩

鄆王拱徽宗子初封定國公薨追封王

和王棫徽宗子初封廣國公積封至和王

信王榛徽宗子初封福國公積封至信王靖康從北狩

至河北得脫馬廣以鄉兵保慶源五馬山寨奉榛為主

建炎二年詔爲河外兵馬都元帥後虜破山寨不知所終

漢王椿徽宗子初封慶國公薨追封王

安康郡王榘徽宗子初封衛國公進封安康郡王

廣平郡王榘徽宗子初封韓國公靖康時追封

陳王機徽宗子早薨追封

相國公樾徽宗子政和四年封

瀛國公榘徽宗子政和五年封

建安郡王橫徽宗子初封惠國公宣和時追封

嘉國公椅徽宗子政和八年封

溫國公棟徽宗子政和八年封
英國公穗徽宗子宣和二年封
儀國公桐徽宗子宣和三年封
昌國公柄徽宗子宣和四年封
潤國公縱徽宗子宣和七年封

右徽宗之世

元懿太子勇高宗子初封魏國公苗傅劉正彥爲逆立
勇爲帝改元明受上復辟立爲皇太子其年薨贈元懿
太子

右高宗之世

莊文太子愔孝宗子紹興三十二年封鄧王乾道元年
立爲皇太子三年薨年二十四追諡

挺愔子武當軍節度使豫國公

魏惠獻王愷孝宗子初封慶王繼封魏王乾道七年薨
柄愷子昭慶軍節度使吳興郡王贈沂王諡靖惠

右孝宗之世

景獻太子曦藝祖十世孫燕懿王後寧宗慶元四年育
於宮中嘉泰二年封衛國公開禧元年爲皇子封榮王
三年立爲皇太子嘉定十三年薨年二十八追諡
華冲穆王坦寧宗子早薨追封

申冲懿王愨寧宗子早薨追封

順冲懷王忻寧宗子早薨追封

肅冲昭王怕寧宗子早薨追封

濟陽郡王竑沂靖惠王子嘉定十四年立為皇子封祁

國公再封濟國公十七年進封濟陽郡王

右寧宗之世

文獻通考卷第二百七十七



